

DOMENIE XXVIII «VIE PAL AN»

Antifone di jentrade Sal 129,3-4

Se tu tegnîs cont, Signôr, de tristerie, cui rivaraial a parâsi?
Ma li di te si cjate misericordie, Diu di Israel.

Colete

La tô gracie, Signôr, ti preîn,
che e cjamini simpri denant di nô e nus compagni,
e nus fasi jessi saldo impegnâts intes oparis.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sap 7,7-11

A preference de sapience o ài calcoladis lis ricjecis un nuie.

Dal libri de Sapience
O ài preât, e mi è stade dade l'inteligence;
o ài suplicât, e dentri di me al è rivât il spirt de sapience.
Le ài preferide ai bastons dal comant e a lis sentis dai rêš
e o ài calcoladis lis ricjecis un nuie a preference di jê;
no ài metude a pâr di jê la pierre plui preziose,
parcè che dut l'aur, denant di jê, al è un pugn di savalon,
e tant che pantan al sarà stimât denant di jê l'arint.
I ài volût plui ben che no a la salût e a la bielece,
o ài preferît di vêle impen de lûs,
parcè che il sflandôr che al salte fûr di jê nol va a mont.
Insiemi cun jê mi son vignûts ducj i bens
e tes sôs mans a son ricjecis
che no si rive nancje a misurâlis.
Peraule di Diu.

SALM RESPONSORIÂL dal Salm 89

R. Danus, Signôr, la sapience dal cûr.

Insegninus a contâ i nestris dîs,
e cussî o podarîn rivâ a la sapience dal cûr.
Voltiti, Signôr; fin cuant mo...?
Ve dûl dai tiei servidôrs. **R.**

Saciinus a buinore cu la tô gracie,
e o gjoldarîn in contentece par ducj i nestris dîs.
Torninus la ligrie pai dîs che tu nus âs batûts,
par rifondinus des anadis
che o vin viodudis dome disgraciis. **R.**

Che a puedin viodi i tiei fameis dutis lis tôs voris
e che si slargji la tô glorie parsore dai lôr fis.
Che al sedi sore di nô il boncûr dal Signôr nestri Diu.
La vore des tôs mans par nô rinfuarce. **R.**

SECONDE LETURE Eb 4,12-13

La peraule di Diu e scrutine lis ideis e i pinsîrs dal cûr.

De letare ai Ebreus

Fradis, la peraule di Diu e je vive, fuarte, e e çonçe plui di ogni spade a dopli tai; e va in dentri fintremai là che si zontin la vite e il spirt, lis commissuris e la medole, e e scrutine lis ideis e i pinsîrs dal cûr. No 'nd è creature che e puedi platâsi denant di lui, ma dut al è crot e distaponât pai siei vôi e a lui o vin di rindii cont.

Peraule di Diu.

CJANT AL VANZELI cf. Ef 1,17-18

R. Aleluia, aleluia.

Il Pari dal Signôr nestri Jesù Crist
che nus dedi un spirt di sapience
par che o podìn rivâ a capî
cuale che e je la sperance de nestre clamade.

R. Aleluia.

VANZELI Mc 10,17-30

Vent dut ce che tu âs, po ven daûr di me.

Dal vanzeli seont Marc

In chê volte, intant che Jesù al stave saltant fûr su la strade, un i corè incuintri, si butà denant dai siei pîts e i disè: «Mestri bon, ce aio di fâ par vê la vite eterne?». I rispuindè Jesù: «Parcè mi clamistu bon? Nissun nol è bon, fûr di un sôl: Diu. Tu cognossis pûr i comandaments: No sta copâ, no sta fâ adulteri, no sta robâ, no sta testimonê il fals, no sta imbroiâ, onore to pari e tô mari».

Ma chel i rispuindè: «Mestri, dutis chestis robis jo lis ài rispietadis di frut in sù». Alore Jesù, cjalantlu cun afiet, i disè: «Ti mancje dome une robe. Va, vent dut ce che tu âs, daural ai puars e tu varâs un tesaur tal cîl; po ven daûr di me». Sintint cussì, però, chel al fasè muse serie e si 'nt lè dut avilît, parcè che al veve une vore di robe.

Alore Jesù, cjalant ator, ur disè ai dissepui: «Ce dificil che al è pai siôrs jentrâ tal ream di Diu!». I dissepui a restarin scaturîts di chestis peraulis; ma Jesù, tornant a cjapâ la peraule, ur disè: «Fîs miei di cûr, ce dificil che al è jentrâ tal ream di Diu! Al è plui facil che un camêl al passi pe buse di une gusele, che no che un siôr al jentri tal ream di Diu». E chei, scaturîts inmò di plui, si ciscavin un cul altri: «E cui rivial alore a salvâsi?». Ma Jesù, cjalantju, ur disè: «Pai oms al è impossibil, ma no par Diu. Par Diu, di fat, al è pussibil dut».

Alore Pieri al tacà a dîi: «Ve: nô o vin bandonât dut e o sin vignûts daûr di te». I rispuindè Jesù: «Us al dîs in veretât: Nol è nissun che al vedi bandonât cjase o fradis o sûrs o mari o pari o fîs o cjamps par colpe mê e dal vanzeli, che nol cjapi cumò, in chest timp culi, cent voltis tant in cjasis, fradis, sûrs, maris, fîs e cjamps, insiemi cu lis persecuzions, e la vite eterne tal mont a vignî».

Peraule dal Signôr.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in grazie di chest at di sante religjon,
o podìn rivâ a la glorie dal cîl.
Par Crist nestri Signôr.

Antifone a la comunion Sal 33,11

I grancj a son colâts in miserie e la fan a patissin,
ma chei che si avodin al Signôr no ur mancje propit nuie.

O ben: 1 Zn 3,2

Cuant che il Signôr si pandarà,

nô o sarìn sul so stamp,
parcè che lu viodarìn come che al è.

Daspò de comunion

O suplichìn umilmentri la tô maiestât, Signôr,
par che tu nus fasis vê part de vite divine
come che tu nus nudrissis cul sant sostentament dal Cuarp e dal Sanc.
Par Crist nestri Signôr.